



SIPA nastavlja istragu

Još prijavljenih zbog pljačke Centralne banke

Državna agencija za istrage i zaštitu izvijestila je Tužilaštvo BiH o nastavku istrage o pljački 600 hiljada maraka iz trezora Centralne banke BiH koja je otkrivena 10. decembra prošle godine. U nastavku ove istrage prijavljena su 32 službenika Centralne banke zbog krivičnog djela nesavjestan rad u službi. Smatra se da su njihovi propusti neizravno doveli do pljačke novca za koju je direktno odgovoran Nedžad Bajraktarević, koji je priznao krivicu.

Podsjetimo, Bajraktarević je kao referent za gotovinske transakcije u Odjeljenju za trezorske poslove CBBiH u tri navrata od 2012. do 2014. ukrao 600 hiljada KM u apoenima od 200 KM.

Na listi prijavljenih su, među ostalim, direktor Glavne jedinice Sarajevo Sadik Kadrić, šef trezora Centralne jedinice u Sarajevu En-

ver Pačuka i glavni interni revizor Edis Kovačević. Prijavljeni su i šef unutrašnjeg osiguranja, službenici na osiguranju, blagajnici i članovi povjerenstva za popis.

Iz Centralne banke BiH za naš list kratko su kazali da nisu upoznati o detaljima novih prijava njihovih službenika jer kompletnu istragu vodi SIPA, tako da oni nemaju ništa s tim. Centralna banka prethodno je saopćila da je "u vezi s ovim slučajem jedan službenik priznao počinjeno djelo i nalazi se u pritvoru. CBBiH u potpunosti surađuje i vjeruje institucijama BiH koje rade na ovom slučaju i dostavlja sve neophodne informacije u interesu istrage. Napominjemo kako je Centralna banka otkrila slučaj internim kontrolama i prijavila počinitelja, te pozvala nadležne institucije da obave svoj posao".

Portparolka SIPA Kristina Jozić



također nam je kazala da ne može govoriti o detaljima na koji način su prijavljene osobe nesavjesno postupale.

"SIPA u proteklom periodu intenzivno radi na ovom predmetu s ciljem prikupljanja dokaza, rasvjetljavanja cijelog slučaja i otkrivanja počinitelja krivičnih djela, što je rezultiralo podnošenjem izvješća Tužilaštvu BiH. Policijski službenici SIPA, pod nadzorom postupajućeg tužioca Tužilaštva BiH, nastavljaju dalje aktivnosti na ovom predmetu", kazala je Jozić. (E.R.)